

պատրիարք դարձնելու աշխատեցաւ, որպէսզի այս կերպով հին և նոր պարտքերը միանգամայն կարենան գանձել:

Արքարե՝ Սարգիս բանտէն ելլելով Ադրիանուպոլիս գնաց Եպարքոսին ետեւէն և պատրիարքութեան հրովարտակ առնելով Պոլիս դարձաւ, Յովհաննէսը վտարեց և ինքը տիրացաւ աթոռին (1664 Ապրիլ): Սակայն իր պահանջատէրերէն չփրկուեցաւ: Թէև իր քարոզներէն կ'ախորժէր ժողովուրդը և հետեզհետէ իր բարեկամները կը շատնային ու օգնուէին իւր իշխաններ ալ կ'ըլլային իրեն, սակայն իր պարտքերը շատ էին, ծանր տոկոսներով: Ան յաճախ ստիպուած էր կերակրել իր պահանջատէրերը, որոնք կու գային մնալ իր տունը, ծառաներով և ձիերով միասին: Եթէ պաշտօնի վրայ մնար, թերեւս կարենար այս տխուր վիճակէն փրկուիլ, սակայն պարագաները աննպաստ ձեւով մը դասաւորուեցան իր դէմ:

Յովհաննէս Թիւթիւնճի, պատրիարքութենէ իյնալէն ետքը, Թըլթըլեանները իրենց գլխաւորներէն երկու հոգիի պաշտօն տուին Պելկրատ երթալ մեծ Եպարքոսին ետեւէն, զայն կաշառելու և Սարգիս Թէքրիտաղցին տապալելու համար: Իրենց պատգամաւորներուն ընկերացուցին նաև Յովհաննէս Թիւթիւնճին, խոստանալով անոր վճարել ինչ ծախք որ երթար իրենց նպատակին իրագործման համար:

Յովհաննէս Թիւթիւնճի Պելկրատ հասնելով հաստատուեցաւ տուն մը, ուր եկան զինքը գտնել արքունի բանակին իբր հայթայթիչ կամ իբր պաշտօնեայ գործող հայ վաճառականներէն և իշխանաւորներէն ոմանք և զինքը մեղադրեցին «բազում բանիւ»: «Դուն, ըսին, որ այսչափ քրիստոնեաներու դրամը վատնեցիր և պատճառ եղար ժողովուրդին